



Carnaval 60 tur na diamanta!



Aruba ta di fiesta, nos ta celebra 60 aña di Carnaval. Tur dorna cu pluma, glitter, stenci y hopi briyo, y bailando yen di zjeito riba ritmo di tumba bon cera y roadmarch campeon, nos ta celebra nos dushi fiesta cultural tur afo. Den dje of na banda nos lo aporta pa haci Carnaval 60 inolvidabel.

Un poco di historia

Aruba su progreso economico a bira mas visibel despues di añanan 20 den e siglo anterior. Mas y mas hoben a haya acceso na enseñansa, e refineria Lago a cuminsa opera oficialmente na 1927, e prome avion ta aterisa na 1925 y e bida social di e Arubiano tambe ta cambia.

E prome clubnan social na Oranjestad ta cuminsa organisa fiestanan di carnaval, pero no riba caya. Tambe e diferente nacionalidadnan cu a bin establece nan mes na Aruba pa traha entre otro den Lago, a cuminsa lanta nan mesun club pa organisa actividadnan social.

Den añanan 30 ta cuminsa mira e prome celebracion di carnaval riba caya; trucknan dorna cu hala di coco ta sirbi como carosa. Ta parce cu e carnaval na Oranjestad tabata conoci como e parada di carosa, mientras cu na San Nicolas a publico a scoge pa baila na pia riba caya. Na aña 1945, ora cu e Segundo Guerra mundial a termina, e personanan di e islanan Ingles a organisa un parada di victoria na pia. Un par di aña despues e grupo ta haya permiso pa celebra carnaval den cayanan di San Nicolas na ocasion di celebracion di e hubileo di oro di Reina Wilhelmina.

Calvin Assang di Trinidad a organisa e parada na 1948 y su grupo a gana e premio di carnaval cu nan disfraz estilo Arabe. Nan a dicidi di bay baila na Playa tambe e mesun aña.

Segun historiadoronan na 1949 Aruba Tivoli Club a dicidi di tene un parada riba caya rond di club pa su miembronan. Asina e carnaval riba caya a crece y den tur distrito tabata celebra carnaval.

Pa coordina e actividadnan, a lanta un comision di carnaval na 1954 bou guia di miembronan di Tivoli y poco poco tur distrito a bin haya representacion den e comision central di Carnaval (CCC), presidi pa Dr. Gustavo Oduber. E prome parada oficial a tuma luga na 1955 y a bini cu un estructura; por ehempel un Prins y Pancho pa guia e parada y eleccion di reina. Casper "Cappy" Lacle a wordo eligi como Prins di Carnaval y e prome Reina tabata Evelina Croes, kende a wordo eligi den Lago Sport Park (awe Joe Laveist Sport park). E musica cu tabata domina tabata di steelband tocando ritmo di calypso conoci for di Trinidad.

Na 1957 a bini cu e tradicion pa organisa un parada na San Nicolas y uno na Oranjestad.

E organisacion SAC cu nos conoce actualmente a nace na aña 1964 y su prome presidente tabata señor Milo Croes. A lanta tambe un comision pa carnaval hubenil pa segura cu e hobennan lo lanta cu amor pa carnaval y lo pasa e tradicion di un generacion pa otro.

Tambe e temanan cu grupo sa uza den carnaval a conoce un cambio.

Carnaval di San Nicolas tabata conoci pa su gruponan cu temanan Africano, di guerra y religion. Despues a cambia pa temanan di fantasia tocante flora y fauna.

Na Playa e temanan tabata mas historico. Den e otro distrito a crea gruponan cu tabata presenta un combinacion di temanan di fantasia influencia pa e gruponan di Playa y di San Nicolas. Distrito di Noord a mantene semper su toque crioyo cu a transforma te cu awe den e temanan principal di e gruponan grandi di carnaval.

Na final di decada 70 e gruponan a cuminsa duna atencion na temanan politico. E influencia Afro-Caribense y historico a bira menos. Carnaval di Aruba a haya su propio identidad cu temanan dedica na su flora, fauna, historia, cultura, folklore y turismo.



Poco poco a cuminsa introduci mas evento carnavalesco manera concurso di Roadmarch & Calypso King (desde 2013 Caiso and Soca Monarch), Lighting Parade, Jouvert Morning, Señora Carnival, Youth Parade, Festival di Tumba etc.

Cu tempo e celebracion di carnaval na Aruba a crece tanto den evento, parada, luho, creatividad, participante etc. Tabata tin un temporada cu e musica di asambleho, brassband a domiña bastante den carnaval. Gruponan di steelband tambe a bira minimal y e musica cu mas ta domina awendia ta estilo soca etc. den parada.

Instancianan particular tambe ta organisa fiesta di carnaval sea pa recreacion of pa recauda fondo pa un meta social.

Organisacionnan social mas y mas ta activo durante e temporada di Carnaval pa conscientisa hoben y adulto tocante cierto riesgo manera

peliger di solo, cuidu di oido, cuidu di mucha chikito, abuso di alcohol, comportacion personal, cuidu di medio ambiente etc.

Mester remarca cu tabata dificil pa haya informacion obhetivo unda e prome celebracion di carnaval a cuminsa si ta na Oranjestad of San Nicolas. Hecho ta cu Oranjestad tabata conoci pa celebracion den club y San Nicolas pa e baile riba caya.

Fuente consulta: "Aruba Carnival" by Vanja Oduber, november 1996
Ilustracion cortesia di Eric Boeldak

Nos ta desea pa tur hende, specialmente nos hobennan, celebra un Carnaval 60 na un forma sano y tene cuenta cu nada di mas no ta bon!!!